

Cama Tsətsəfə Nə Bulusu Anə Njir Afisa

Usa Dzau

¹ Cama tsətsəfə kə sara ara Bulusu, cama səsə nə Kərsiti Yesu lagur yiwu hudə nə Hyal, anə nji cici gə Hyal kəra wu Afisa, njir məl thlər tsa'a miya dəfu wu Kərsiti Yesu.

² Bəgə mayiwakur ənga hudə pərtəu sara ara Hyal Dərmən ənga Thlagə Yesu Kərsiti nda nggya ənga hyi.

Barka Mambəl Wu Kərsiti

³ Barka a nggyari anə Hyal, dəya Thlagər mən Yesu Kərsiti, ndəra fənggər mən barka sara dəməlau. Naja ndəra fənggər mən barka ənga kalar culi barka mamambəl wu Kərsiti.

⁴ Ara Hyal cadəbiya mən arya Kərsiti, kadivira ji dzəguya duniya. Ji cadəbiya mən aga mənə də cicau ənga gərə vazau wu mwa nyi.

Arya yiwukur nyi,

⁵ ji mbiya tsu kadəu aga mənə də ar viya wazha nyi lagu Yesu Kərsiti, ənggərə ju pina huda ja ənga yiwu huda ja.

⁶ Ji məl abangau aga mənə sən fal Hyal ara kadakadarkur mayiwakur nyi. Mayiwakur kau, ji nə mən kurthləu lagu zər nyi, ju yiwu nyi.

⁷ Lagur pə mashi Kərsiti nga mən uya bəlbiya dzau sara wu mafakur, ca ngə təfəbiya dzə sara wu bikau. Ji məl abangə tsa'a aga gangəkur mayiwakur nə Hyal,

⁸ kəra ji pənggər mən gagadəu ənga patər hangəkər ba sənbiya sau.

⁹ Wu məliya huḍa Hyal pipida, ca nga ji məliya mən aga mənə sənbiya yiwu huḍa ja kəra dəḍəwa, kəra ji nyabiya wu Kərsiti.

¹⁰ Naja kə ngə yiwu huḍa Hyal kəra ju nda nyabiya ma pəca nyi ḍa. Ju nda tsəmiya kalar sə kəra a dəməlmau ənga wu duniya əgyakida dənamar Kərsiti.

¹¹ Wu Kərsiti tsu nga 'yi ḍa sər fa'a ki nə Hyal. Ji mbabiya 'ya abəngau tsu kadəu, ənggər kəra ji pəḍləya wu ḍəḍwa ja. Naja Hyal ndəra vər məl kalar sə kakal aga yiwur huḍa ja.

¹² Ji məliya abəngə aga na'ya njira fər kər ənga Kərsiti tanggərma, 'ya fal kadakadarkur nyi.

¹³ Ənga nahyi tsu, lagu Kərsiti nga hyi nggari ndər jiri, ndəshigu kəra mbəḍana hyi. Ma ga hənggəri ba Hyal a sa nə hyi Mambəl Cici kəra ji hər alkawala nyi abər ju nə hyi. Mambəl Cici kə wu nggya mətsam nyi ar hyi.

¹⁴ Mambəl Cici ngə sər zhu kəra cabiya abər Hyal wu nda nə mən sər fa'a ki, kəl pəcira Hyal wu nda bəliya nji nyi. Sə'yar kə ḍa patəu aga shili ənga fal nə kadakadarkur nyi.

Kədi Hyal Ənga Lə Usaku Nə Bulusu

¹⁵ Arya kau, ənggəra yi nggari ar kəra mbərsar hyi wu Thlagə Yesu ənga yiwudzə kəra ara hyi anə patər nji cici gə Hyal,

¹⁶ nayi piyari lə usaku anə Hyal arya hyi mai, ar kalar pəci kəra yu kədi Hyal.

¹⁷ Kədi Hyal ḍa anə hyi ca ngə Hyal nə Thlagər mən Yesu Kərsiti, Tada kəra ənga kadakadarkur, ja

nə hyi mambəl nə hahangəkur ənga ja cabiya hyi Hyal aga hya cakəri səni nyi.

¹⁸ Kədi Hyal də tsu ca ngə tsu aga ja nyabiya dəfuwa hyi ənga mbəmbəl aga hya nggabiya sə ar kəra fər kər kəra nji ngga hyi a shili a gwa, aga hya sənbiya gangəkura kadakadarkur nə sər fa'a ki kəra nji fiya anə nji cici gə Hyal.

¹⁹ Ənga tsu ya vər kədi Hyal anə hyi, aga hya nggabiya madiya dəgalkura dənamar Hyal kəra ara mən, namən njira hənggəri ənga ja. Dənama kau, sə zəmə nga ja ənga madiya dənama,

²⁰ kəra Hyal hya'ana Kərsiti sara vir tə əni. Dənamar Hyal kə ngə nə nyi vir nggya mənəhəu ar tsi mazəma Hyal a dəməlməu.

²¹ A dənə ngə Kərsiti a vər səm təlkur ar kəra təltəl 'yar, ənga mambəl tədəmwa, ənga mambəl dənama təlkur, ənga mambəl dənama, ba ənga ar kəra kalar thləm kəra nji ləri wu zaman əshina kau ənga zaman kəra a vər shili.

²² Hyal a fiyari kalar sə əgyakida təlkur nə Kərsiti, ənga ji məliya nyi ji də kər a dar kəra kalar sau, aga ja də sər akkəri anə dəbə dzə njir nu.

²³ Dəbə dzə njir nu kau, ca ngə dza Kərsiti nga nyi. Wu dəbə dzə njir nu kau, Kərsiti a nyabiyar dzau, ənggər kəra naja ənga kərnyi a nyabiyari kalar sau.

2

Mbədəu Wu Kərsiti

¹ Dədəm nji tətə nga hyi ara sər məla hyi kəra dəmwa'yu ənga bikər hyi 'yar.

² Nahyi, hyi nggya wu bikə dədəməu, ar pəcira hyu nu lagu nə njir duniya kau, ənga hya vər nu

shatan, təl mambəl dəmwa'yu. Naja ngə mambəl kəra a vər məl thlər wu dəfuwa njira nggəl ara bəlar səra Hyal wu na.

³ Abangə nga mən patə dədəməu, mənə vər nu səra dza mən wu yiwu nə bikə bikau, ca ngə cimər mən ənga dəngar mən. Arya kə nga mən də njir hə hudə ndzəndzə nə Hyal ənggər kalar ndau.

⁴ Ama ara gangəkura təhudə nyi ənga yiwudzə nyi anə mən,

⁵ alaga ta, a dər mən nji tətəu wu bikə ta, ba ji məliya mən, mən də ənga pi ənga Kərsiti. Lagu mayiwakur nə Hyal nga hyi uya mbədau.

⁶ Ənga ji hya'ana mən sara vir tau ənga Kərsiti ba ənga ji nər mən vir nggya ənga Kərsiti a dəməlmau arya Kərsiti Yesu.

⁷ Hyal məl abangau, aga ar pəci kə zəgəu, ju cabiya nyi anə nji dəgalkura madiya mayiwakur nə nyi kəra cabiya dzau anə mən ar babal wu yiwukur nyi lagur Kərsiti Yesu.

⁸ Ara lagur mayiwakur Hyal nga hyi uya mbədau, lagur mbərsar hyi. Nahyi a'yi asən hər dləva nyi mai, ama lə sə kurthlə ngau, sara ara Hyal.

⁹ Mbədau a'yi səra nju uya lagur məl sə mənəhə ngə mai, agabangau, ndər sən hwavi ar kəri a'yi tsu mai.

¹⁰ Arya namən səra Hyal həriya ngau. Ji məliya mən mafəliyangə wu Kərsiti Yesu, aga mənə dumwa ənga məl sə mənəhə kəra ji fuwa wu lagu tsu kadəu aga mənə məl.

¹¹ Agabangau, dɛngara mau ɛnggɛra hyu nggya dɛdɛmɛu. Nahyi a'yi njir Yahudiya lagur ya mai. Njir Yahudiya kɛra wu ngga kɛrnda, “njira nji thlana nda pɛlzha”, nanda ngɛ njira vɛr ngga hyi, “njira gɛra thla pɛlzha.” Ama pɛlzhar nda kɛra nju mɛl ɛnga tsi ngau, a'yi wu tsɛkwar dɛfuwa nda mai ama a biyar kumɛr dzau.

¹² Dɛngara mau abɛr dɛdɛm tɛtɛkɛ nga hyi ɛnga Kɛrsiti, nahyi njira a'yi njir Izirayila mai, ɛnga mɛthlɛpi nga hyi anɛ alkawal mbamba nɛ Hyal. Wu duniya kau, a'yi hyi ɛnga fɛr kɛr mai, ba a'yi hyi ɛnga Hyal tsu mai.

¹³ Ama kabangɛkau, wu Kɛrsiti Yesu, nahyi njira dɛdɛm nadɛu, a hɛr hyir nji lɛhɛu a shili, lagur mashi Kɛrsiti.

¹⁴ Ara Kɛrsiti ngɛ nggya jamɛkurɛr mɛn, naja ndɛra daɓɛya njir Yahudiya ɛnga njira a'yi njir Yahudiya mai ndɛ da culi nji zɛmɛu. Naja ngɛ dlana dawakur kɛra tɛkɛbiya nda.

¹⁵ Ji lɛr dza ja aga ja dazhina dladɛ nɛ highiɓɛ Musa kɛra nyinyau ɛnga sɛr ɓɛla. Ji mɛl abangau, aga ja daɓaga mɛliya culi nji mafɛliyangɛ zɛmɛu wu kɛrnyi sara wu culi nji pampam mɛthlɛu. Lagu kau, nga ji shili ɛnga nggya jamɛ wu pama nda.

¹⁶ Ji mɛl abangɛ tsu wu dzɛ zɛmɛ kau, aga ja ɓasɛwa nda gyapɛu anɛ Hyal, lagur tɛ nyi a dar wu dladlakau. Lagu kɛ nga ji hɛna dawa kɛra a'yi wu pama nda dɛdɛmɛu.

¹⁷ Ji shili aga ja sa tɛtɛlna ndɛshigu nɛ nggya jamɛkur anɛ hyi, nahyi njira a'yi njir Yahudiya mai, njira nadɛ ara Hyal. Abangɛ tsu a tɛtɛlnar ja ndɛshigu nɛ nggya jamɛkur anɛ njir Yahudiya,

nanda njira ləhəu.

¹⁸ Ara lagu nyi nga mən gyapəu, nga mən uya shili ara Tada lagu Mambəl Hyal zəməu.

¹⁹ Agabangau, nahyi njira a'yi njir Yahudiya mai, a'yi hyi bəra də nji shishili mai ənga tsu a'yi hyi bəra də məthləpi mai. Ama a dəar hyi nji zəmə əkkə'yi nji cici nə Hyal, ənga a dəar hyi njir ki nyi.

²⁰ Ki nyi kau, nji həriya ar vi fə hi hər nə cama səsə'yar ənga nabi'yar. Tsəka hada nə hər kau, Kərsiti Yesu ənga kənyı ngau.

²¹ Naja ngə ndəra səbiya hər kau ar vi zəməu, ənga naja ngu nda məliya hər kau ja hau, aga ja də vi cici nə Thlagəu.

²² Ənga wu ja tsu nga nji həriya hyi dəbə əkkə'yi njir Yahudiya, aga hya də ki kəra Hyal wu nggya a gwa lagu Mambəl nyi.

3

Thlər Nə Bulusu Anə Njira A'yi Njir Yahudiya Mai

¹ Agabangau, nayi Bulusu, nayi ndəra nji fuwa wu fursəna ara nu Kərsiti Yesu arya hyi, nahyi njira a'yi njir Yahudiya mai.

² A hənggər yau, abər a nggar hyi ənggəra Hyal wu lagu mayiwakur nyi nə də thlər kau nə dləwar hyi.

³ Najakə ngə sə dədəwa kəra canə də kər lagur mətakər, ənggər kəra yi tsəfəri anə hyi ndər yidawu.

⁴ Ma ga jiganari, gu nggabiya səra yi səni, səra a'yi dədəwa ar kəra Kərsiti,

⁵ kəra a'yi canə nyi kər anə njir zaman zaman kəra tərabiya kə mai, ənggər kəra ji canə nyi kər

lagu Mambəl Hyal anə cama səsə nyi'yar ənga nabi nyi'yar kəra cicau.

⁶ Najaka sə dədəwa ca ngə, abər, lagur ndəshigu kə ngə njira a'yi njir Yahudiya mai wu uya sər fa'a ki ənga njir Yahudiya, ənga a dar nda nji zəmə wu dabə dzau, ba ənga ndu sa səm alkawal dadabə kəra Hyal məliya wu Kərsiti Yesu.

⁷ Yi da mafa nə ndəshigu kau, lagur mayiwakur nə Hyal kəra yi dləwuri lagur məl thlər dənəma nyi.

⁸ Alaga kə naye nga ndiya ənga kushu wu pama patər nji cici nə Hyal, nji nə da najaka mayiwakur aga ya tətəlna ndəshigu anə njira a'yi njir Yahudiya mai. Ndəshigu kau, ca ngə barka dədəwa kəra nji gəra sən walbiya wu Kərsiti.

⁹ Naye tsu ya cabiya anə kalar nji ar babal lagu kəra ji pabəri nə məl sə dədəwa nyi, sə kəra Hyal dəwana wu kərnyə fa gangə kəra tərabiya kau, ndəra naja ngə məliya kalar sau.

¹⁰ Dənga nyi ənga najaka mayiwakur ca ngə, lagur dabə dzə njir nu, nji a cabiya gangəkura hahangəkur nə Hyal anə mambəl mambəl kəra a vər səm təlkur ənga dənəma dənəma təlkur'yar kəra a dəməlmau.

¹¹ Kə darkər ənggər kəra Hyal mbiya tsu kadəu, kəra ji nyabiya wu Kərsiti Yesu Thlagər mən.

¹² Wu ja ənga lagur mbərsa wu ja nga mənə səni shili əgya Hyal ənga dəfu zəməu ba gəra hivər.

¹³ Agabəngau, yu kədi hyi, a sara dza hya tə arya bəwaḃwatə kəra yi a gwa arya hyi mai, naja ngə kadakadarkur hyi.

Kədi Hyal Nə Bulusu Arya Njir Afisa

¹⁴ Arya kau, yu bəliya undi wu mwar Dərmən,

¹⁵ naja ndëra patër njira a dëmëlmau ënga njira wu duniya biya sara wu ja.

¹⁶ Ya vër këdi nyi, abër sara wu gangëkur kadakadarkur nyi aga ja nyabiya hyi ënga dënama wu dëfuwa hyi lagu Mambël nyi,

¹⁷ aga Kërsiti a nggya wu dëfuwa hyi lagur mbërša. Ba ënga yu këdiyau, aga hya ciya hi wu yiwudzau,

¹⁸ aga hya uya dënama daḅë ënga patër nji cici gë Hyal, aga hya nggabiya culi dlaḅëkura yiwukur në Kërsiti, ënga tęgukura nyi, ënga dzëgamëkura nyi a gya, ba ënga dzëgamëkura nyi a dë.

¹⁹ Ənga tsu yu bëra këdi Hyal aga hya sën yiwukur në Kërsiti këra tërabiya a biya banga patër sën sau, aga hya nyabiya dzau wu nyinyikur në Hyal.

²⁰ Kadakadarkur a nggyari anë Hyalër mën, ndëra dënama nyi a vër mël thlër wu mën a ndiya sëra mën wu këdiyau, ënga sëra mën wu dënga.

²¹ Kadakadarkur a nggyari anë nyi wu daḅë dzë njir nu ënga wu Kërsiti Yesu, wu zaman pamëpamë patëu, ba'anuwa! Amina.

4

Daḅër Kër Wu Daḅë Dzë Njir Nu

¹ Agabangau, nayi ndëra wu fursëna arya nu Thlagëu, yu këdi hyi aga hya nggya në nggyabiya këra kyau ënga ngga këra nji ngga hyi.

² Cumu hya nggya njira gëra hakër, ënga nji shishi'wu dëfu, ënga nji sësë'u sau, ba ënga njir sësë'u kuvwar nda wu yiwudzau.

³ Hya nërdzau, aga hya sëḅiya daḅër kërër hyi këra Mambël në hyi lagur nggya në jamëkur këra dzëḅiya hyi.

⁴ Dzə zəməu ngau, ənga Mambəl zəməu, ənggər kəra nji nggar hyi a shili wu fər kər zəməu.

⁵ Thlagə zəməu ngau, ənga mbərsa zəməu, ba ənga tsu babətizəma zəməu.

⁶ Hyal zəməu ngau, Diya kalar ndau, ndəra ar kəra kalar ndau, lagu nji patəu, ənga wu nji patəu.

⁷ Ama anə kalar ndə wu pama mən, Kərsiti a nə nyi ri lə sə ləlau tsa'a ənggər kəra ji lari.

⁸ Ənggəra ndər Hyal nana,
“Ənggəra ji ma'yi a dar madzəgaməu,
ji fa'ari njira nji mbari patə əkkə'yi ja,
kə ji lər sə ləlau anə nji nyi.”

⁹ Mi ngə sə kə cabiya, “Ji ma'yi a də” ka? A cabiyari abər tanggərma ji ma'yi a gyu'yi!

¹⁰ Naja ndəra ma'yi a gyu'yi ngə ma'yi ta a dəməlmau, aga ja nyabiya kalar səra ji məliya.

¹¹ Naja ngə ləri sə lələ paməpamə anə nji. Lə sə lələ alenyi nji, cama səsau, ənga alenyi nji tsu, nabi, ənga alenyi nji tsu, tətəlna ndər Hyal, ənga alenyi nji tsu, bəla nji ənga maləmə.

¹² Ji məl abangau, aga nji kə a daḡaga pabəri nji cici nə Hyal, aga məl thlər nyi, aga həbiya dza Kərsiti.

¹³ Nju dumwa ənga məl abangau, kəl mənə də nji zəmə wu mbərsa, ənga nji zəmə wu sənbiya Zər Hyal. Ba mənə də njira nəbiya dzau, njira təkəri nggya nyinyau nə Kərsiti.

¹⁴ Nji məl abangə ara mənə sara bəra sha aga wazha yididəu, alaga njira nju tətəl ənga hangəkala nda, njira njir highiḡə paməpamə wu shabiya hangəkala nda ənggər səra mələ majigwal, njira njir dabar tsu ndu sən nggutana nda ba nda səmku nda ənga fati.

15 Ar viya kau, kuji kə mənə nana sərə jiri wu yiwukur. Lagur na jiri kə nga mənə hə wu ja wu kalar sau, naja kərə ar viya kər anə njir nu Kərsiti.

16 Sara ara ja ngə patər dzə dəbiya dzau, ənga ji səbiya nda lagur dləwa dzə nə bəlatəu. Ba ji məliya nda ndə hau, ənga həriya dzau wu yiwukur, ənggər kərə kalar gashal gashal dzə a vər məl thlər nyi.

Nggyabiya Mafəliyangə Wu Kərsiti

17 Nggara mau, yu na anə hyi, ənga yu cakər na anə hyi wu thləmə Thlagəu, tsu hya bəra nggya ənggər njira gərə sən Hyal mai, njira fuwa dəngar nda wu sə kurthləu.

18 Dəfuwa nda nyinyi nga nyi ənga kuthləu, kərə kar nda ara sən nggyabiya sə Hyal. Arya ɓabalkura dəfuwa nda ənga arya gərə sənkurər nda, ba nji təkəbiya nda ənga pi kərə Hyal ngə wu lau.

19 Ara gərə səlikurər nda, ba ndə lər kərnda anə səsukur, ba da kəl kalar sə zhizhigər nga ndu məl cumu.

20 A'yi culi səkə nga hyi highiḃəri ar kərə Kərsiti mai.

21 A hənggər yi abər a nggar hyi sə ar kərə ja, ənga a highiḃər hyir nji jiri ar kərə Yesu.

22 Sərə nji highiḃər hyi ca ngə hya piyari nggyabiya nə ndəndəkur kərə hyi a gwa dədəməu, nggyabiya dididī kərə wu shili ənga suna paməpamə kərə nggutana hyi.

23 A kyau, hya piyari Mambəl Hyal ja shabiya dəngar hyi a da mafəliyangəu.

24 Hya hari nggyabiya mafəliyangə kərə Hyal məliya kərə a papa kərny, nggyabiya kərə cabiya dzə wu nggya tsapəkər ənga nggya cicikur.

²⁵ Agabangau, hya piyari thla fati, hya nggya njir thla jiri anə kuvwar nda, arya namən, nji zəmə nga mən.

²⁶ A sara huda hyi a ndzə ja fuwa hyu məl bikə mai. A sara ndzə hudər hyi a kar pəci a gya tədə mai.

²⁷ A sara hya nə nyi lagu anə shatan mai.

²⁸ Ndər həl ja sara dumwa ənga həl mai, ama ja da ndər məl thlər tsapəu ənga tsa ja. Abangə nga ju sən uya sərə ju dləwari njira gərə ənga sau.

²⁹ Ndər gərə kyau a sara biya sara wu miya hyi mai, ama kəl ndər kərə wu daḃaga məliya nji nda hau wu Kərsiti, tsa'a ənggər sərə ndu yiwu. Lagu kə ngə ndər hyi wu da ənga dləwa dzau anə njira wu səhimi.

³⁰ Ətsu a sara hya məliya huda Mambəl Cici nə Hyal a ndzə mai, ara naja ngə mətsam kərə cabiya abər nə Hyal nga hyi ar pəcir bəlbiya dzau.

³¹ Kəl hya təkəbiya dzə ənga da shishi, ənga za'wu dəfu, ənga hudə ndzəndzau, ənga bwari, ənga ndza thləmə, ba ənga səḃə ndə wu hudəu.

³² Hya da ku'ya anə kuvwar hyi, ənga hya təhudə əgya kuvwar hyi, ənga hya təfəbiya kuvwar hyi ənggər kərə Hyal təfəbiya hyi lagur Kərsiti.

5

¹ Ta hyi da wazha kərə Hyal wu yiwu, kəl hya fa'abiya hi culi nggyabiya nə Hyal.

² Hya nggya nggyabiya nə yiwudzə ənggər kərə Kərsiti cabiya mən yiwudzau, kəl ta ji lər kənyi arya mən, ar viya sə lələ kərə kisu ənga sadaka anə Hyal.

³ Ama wu pama hyi, nja sara nggari alaga ənga əngwa abər nju məl səsukur, ənga kalar culi sə zhizhigər, ənga suna mai, arya a'yi kyau anə nji cici nə Hyal mai.

⁴ Abangə tsu ndər gəra səli, ənga ndər hyahya, ənga ndər dzadza, a'yi a ki ənga hyi mai. Ar viya kə hya dumwa ənga usaku anə Hyal.

⁵ Ara pakatə hyu səni, abər ndər məl səsukur, ənga ndər nggya zhizhigər, ənga ndər toma, ndəra kakal nga ja ənga ndər nu katəu, nanda a'yi wu uya fa'a ki ənga təlkur Kərsiti ənga Hyal mai.

⁶ Vanyi ndə ja sara nggutana hyi ənga ndər papatagə mai, arya culi nggyabiya kə ngə hudə ndzəndzə nə Hyal wu shili ar kəra njira gəra bəlar ndər nyi.

⁷ Agabangau, hya sara daḅə kər ənga nda mai.

⁸ Ara dədəm wu kuthlə nga hyi, ama kabangəkau, a uyar hyi mbəmbəlkur lagur Thlagəu. Nahyi, hya nggya ar viya nji mbəmbəl.

⁹ Arya mbəmbəl kau, ngu shili ənga thlər mənəhəu, ənga nggya tsapəu, ənga nggya jijiri.

¹⁰ Hya gal lagura hya daḅaga pina huda Thlagə ari.

¹¹ Hya təkəbiya dzau ənga thlər kuthlə kəra gəra kətiya hyi, kuji hya məliya ja da ar babal.

¹² Ara wu da sə səsəli ma nja ndər ar kəra səra ndu məl ar dəwa.

¹³ Ar pəcira nji dla ənga kalar sə wu mwar mbəmbəl, kalar sə wu da ar babal.

¹⁴ Arya mbəmbəl ngə wu məliya kalar sə ja da ar babal. Ca ngə səra da ji na,

“Hya'ari wu ghanyi nagə ndəra wu ghanyi,
hya'ari sara vir tau,

ba Kərsiti a mbəlna mbəmbəl nyi a gyar gau.”

¹⁵ Agabangau, hya nggya ənga hangəkal wu nggyabiyar hyi. Hya sara nggya ənggər nji dza mai, ama hya da nji hahangəu.

¹⁶ Hya məl thlər ənga kalar pəci kəra hyi uya aga məl sə mənəhəu, ara pəci kəra mən a gwa kau, pəci dəmwa'yi ngau.

¹⁷ Agabangau, hya sara da nji dza mai, ama hya sənbiya sər yiwu huda Thlagəu.

¹⁸ Hya sara nyi ənga padlə mai, kəra wu məliya hya da njir cim məl yambadəkur. Ama hya kyaga nyabiya dzə ənga Mambəl Hyal.

¹⁹ Hya ndər wu pama hyi sara wu Zabura, ənga hya na sara wu ləkakədə na, ənga na mambəl mambəl. Hya dumwa ənga na nə fal Thlagəu ənga dəfuwa hyi papatəu.

²⁰ Ənga cumu hya lər usaku ar kəra kalar sə anə Hyal Tada wu thləmər Yesu Kərsiti Thlagər mən.

²¹ Hya lər kərhyi anə kuvwar hyi wu lagur gənggər nyi səli anə Kərsiti.

Shili Ənga Mathləkə'yi

²² Nahyi mathləkə'yi kəra ənga shili, hya lər kərhyi anə shilər hyi ənggər anə Thlagəu.

²³ Ara sal ngə kəra mala nyi, ənggər kəra Kərsiti ngə kəra dabə dzə njir nu nyi. Naja ənga kərnyi ngə ndər mbəda dabə dzə njir nu nyi kəra ca ngə dza ja.

²⁴ Ənggər kəra dabə dzə njir nu wu lər kər anə Kərsiti, abangə tsu nahyi mathləkə'yi hya lər kərhyi anə shilər hyi, wu kalar sau.

²⁵ Nahyi shili, hya canə nyi yiwukur anə mathləkə'yir hyi ənggər kəra Kərsiti canə nyi anə dabə dzə njir nu nyi. Ji ləri piya ja ar viya ja,

²⁶ aga nda da nji cici anə Hyal lagur cina nda ənga 'yimi lagur ndər Hyal.

²⁷ Ji məliya abangə aga ar pəcira ju nda lər dabə dzə njir nu anə kərny, ndu da nji gumaguma kəra ji cina casəu, gəra didi alaga hahashau, ama cici ənga gəra vazau wu mwa nyi.

²⁸ Abangə tsu, ngə shili, a ca yiwukur anə mathləkə'yir nda, ənggər kəra ndu yiwu dza nda. Kalar ndəra canə nyi yiwukur anə mala nyi, kərny nga ju yiwu.

²⁹ Ara ndər piyari shishir dza kərny a'yi mai, ama ja pabəri dza ja ənga ja nə nyi sər səm, ənggər kəra Kərsiti wu pabə dza dabə dzə njir nu nyi.

³⁰ Ara namən ngə gashal gashal dza ja.

³¹ Ənggər kəra ja tsətsəfau, abər,
“Arya abangau, ndə sal wu piyari dənyi ənga mənəyi,
nda da sə zəmə ənga mala nyi, nanda məthlə
ndu da ar viya ndə zəməu.”

³² Səkə sə dədəwa ngə kəra dzadzau ara nggabiya. Ama ya vər ndər, aga ya cabiya səra wu pama Kərsiti ənga dabə dzə njir nu nyi.

³³ Agabangau, kalar ndə sal, ja cabiya yiwukur anə mala nyi ənggər kəra ju yiwu kərny, ənga kalar mala tsu, ja gənggər nyi səli anə sal nyi.

6

Nggyabiya Wazha Ənga Njir Yar Nda

¹ Wazha, bəlara mau ndər njir yar hyi arya Thlagəu, arya sə tsatsa'a ngau.

² Dladə nə tanggərma kəra Hyal ləri dabə ənga alkawal, ca ngə, “Ga gənggər nyi səli anə dəngau ənga məngau,

³ aga ja nə ngə nggya jaməu ənga fa gangə wu duniya.”

⁴ Nahyi tada'yar, hya sara məliya huda wazhar hyi ja ndzə mai, ama hya hər nda lagur highiə ənga hwathlə nda wu Thlagəu.

Nggyabiya Mafa'yar Ənga Thlagər Kir Nda

⁵ Nahyi mafa'yar, hya ɓəlari səra thlagər kir hyi wu duniya na hya məl ənga gənggər nda səli ba ənga hya həya nda kər. Hya məl thlər anə nda ənga huda zəmə ənggər kəra hya məl anə Kərsiti.

⁶ Hya məl səra ndu yiwu a'yi wu liya nda waci mai, aga hya da dlədləu wu mwar nda mai, ama hya məl thlər ar viya mafa'yar nə Kərsiti, ba hya məl sər yiwu huda Hyal sara wu dəfwa hyi.

⁷ Hya məl thlər anə nda ənga dəfuwa hyi papatəu, ənggər anə Thlagəu, ama a'yi anə ndə mai.

⁸ Hya dəngari abər Thlagə ngu nda lə akkəri anə kalar ndə arya sə mənəhə kəra ji məliya, tara naja mafa ənga alaga zər huda ki.

⁹ Nahyi thlagər ki'yar, hya məl anə mafar hyi abangə tsu wu kalar lagu. Hya sara gərahə nda mai, arya hyu səni abər Thlagər hyi zəmə nga nyi a dəməlmau, ənga naju ca pampamkur mai.

Kar Pa Nə Hyal

¹⁰ Ndər nə kudīya, hya da nənau wu Thlagəu, lagur dəgalkur dənəma nyi.

¹¹ Hya har patər kar pa kəra Hyal nə hyi, aga hya sən ta'yau, hya pana kalar dabar kəra shatan wu shili əni.

¹² Ara par mən a'yi ənga njira ənga kum ənga mashi mai, ama ənga mambəl səm təlkur nə dəmwa 'yikur, ənga dənama təlkur, ənga dənama nə kuthləu wu duniya, ba ənga mambəl mambəl dəmwa'yi'yar kəra a dəməlmau.

¹³ Agabangau, hya har patər kar nə par hyi kəra Hyal nə hyi, aga kalar pəci kəra nə dəmwa'yi shili, hyu sən ta'yau, aga ayukuda pa kau, tsu hyi tata'yi piru.

¹⁴ Agabangau, hya ta'yi piru. Bəgə jirkur ja də sər mba sara hyi, hya mbiya sara hyi əni ɓaɓalu. Bəgə tsapəkur ja də ləgutə liyangə kəra hyu hari aga par hyi.

¹⁵ Bəgə pabə dzə nə tətəlna ndəshigu nə nggya jaməkur ja də ɓiɓir har hyi.

¹⁶ Ayukuda kau, bəgə mbərsa ja də ləgə kəra hyu həri, aga hya tsiya u'u nə hafə sara ara ndə dəmwa 'yu.

¹⁷ Bəgə mbədau ja də dara liyangə kəra hyu hari. Ənga bəgə ndər Hyal, ja də katsakər anə hyi. Katsakər kau, Mambəl Hyal ngə nə hyi.

¹⁸ Ənga hya kədi Hyal cumu wu dənama nə Mambəl Hyal, ənga hya kədi culi pampaməu. Arya kau, hya dumwa ənga tsamə lagu cumu wu capi, ma hyu kədi Hyal anə nji cici gə Hyal patəu.

¹⁹ Nahyi tsu hya dumwa ənga kədi Hyal anə də, aga Hyal a fuwa ndər nyi wu miya yau. Nayi tsu ya dzəgwa ndər anə nji gəra ənga hivər aga ya daɓaga tətəlna sə dədəwa nə ndəshigu.

²⁰ Arya ndəshigu kau, nga yi də cama dəgəci kəra wu fursəna. Hya kədi Hyal anə də aga ya dumwa ənga tətəlna ndəshigu kə gəra ənga hivər ənggər kəra

ya kyaga mæl.

Usa Dzə Nə Jomə Ndəl

²¹ Tikikusu, zamər mən kəra mənū yiwu, mafa Thlagə kəra wu mæl thlər nyi tsa'a miya dəfu, wu nda nar hyi kalar sau, aga hya sənbiya jaməkura yau, ənga səra yu mæl.

²² Yu sə nyi a nda nə hyi aga najaka sau, aga hya daḅaga sənbiya səra 'yi a gwa, ənga aga ja tsətsəkur dəfuwa hyi.

²³ Wazha ama, bəgə nggya ənga hudə pərtəu, ənga yiwu dzau, ba mbərsa sara Hyal Tada ənga Thlagə Yesu Kərsiti, ja nggya ənga hyi.

²⁴ Bəgə mayiwakur ja nggya ənga patər njira wu ca yiwukur, yiwukur gəra kudau, anə Thlagər mən Yesu Kərsiti. Amina.

Ndəshigu'yar Fodəu Ənga Thlər Cama'yar
The New Testament in the Marghi South language of
Nigeria: Ndəshigu'yar Fodəu Ənga Thlər Cama'yar

copyright © 2024 The Seed Company

Language: (Marghi South)

Contributor: Initiative for the Translation and Development of African Languages

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 13 May 2025 from source files dated 13 May 2025

63471087-0de7-5f4b-aa1f-ca2e66571a95